

靜

厓

詩

初

稿

靜厓詩初稿卷七

鎮洋 汪學金 敬箴

古今體四十三首

起甲午七月盡十二
月之木蘭往返作

將之木蘭作

自笑雞窓客今為雁塞行縱橫投筆意浩蕩出關情風
緊盤雕路山圍飲馬城何曾經夢想差不負平生

早涼

嚮北涼秋早商飈撲面迎晴催花鬣喜寒透木棉輕衰
柳河邊影疎蛩草際聲明朝關外路朔雪灑行旌

過牛欄山下作

夕照村邊問渡舟一鞭直北指檀州邊氓盡解勤耕作
莎草陰濃聽叱牛

過密雲縣

樓櫓崔巍出九霄燕雲形勢控全遼山光競射居庸雪
水脈遙通碣石潮地息邊烽農務起時無雨潦漲痕消
勞人何事關心甚憔悴西風萬柳條

穆家峪口號

十里平岡三兩家午炊時節且停車謁來塞北村莊地

瞥見江南籬落花

過九松山下

塞山多沉雄茲峯獨清迥
白雲忽飛來掩映青松頂
雲松兩不分澹澹秋嵐影

夜宿石匣聞笛

露下天高塞磧清
西風羌笛聽分明
白狼河北新秋色
吹入陽關第一聲

石匣曉發

水自層崖落雲從大漠還
涼風初入塞殘月不離山
塞

靜厓詩初稿卷七

馬窺邊色秋花笑客顏回看薊門道曉日照三關

南天門

羣山寨上來千里勢奔瀋峯矗鳥飛難徑仄蛇盤上燕
遼燦列眉日月行在掌蟠松蛻修鱗蹲石突巨額斧鑿
借鬼工梯援絕人想壯哉南天門陡絕不可仰關阨四
塞雄軌度單車廣舉頭見長城規模亦宏敞築怨獨何
為丁男痛篳擗塞下苦兵革白骨埋榛莽哀哀戰士魂
誰獲靈臺賞顧此心骨悲怛焉念疇曩我

朝大一統功德被霄壤邊陲隸畿輔幅員古無兩卽今

口外民安居樂生養不知烽鎬驚但看桑麻長請歌出
塞吟遠遊毋慨慷

出古北口

青山巖嶂樹槎枒立馬平岡殷鼓笳絕壁風雲開紫塞
當關節鉞鎮黃花清時備武三秋戍

聖主同文六服家此日書生騎款段壯遊談笑對人誇

夜宿三間房

我從京師來三日已出塞崎嶇山路艱况瘁僕夫載荒
村三兩家一姓不知代短牆碎石堆破屋枯松蓋日夕

靜庵詩初稿

卷七

三

迫投宿遑問主人在烹雌鄉味甘談虎客心戒析急知
更闌衾寒憎絮敗涼風四山吹夢落長城外

曉度青石梁

青石新開路危梯度馬難山深遲見日塞迴早生寒空
谷傳虛籟懸流落急湍天風吹絕頂斗覺客衣單

夜至王家營

大漠平沙落日黃遠山衰草下牛羊天荒地老燐成陣
月黑風腥虎逐倭邊戶戈鋌貪野獵戍屯刁斗警秋防
一鞭夜覓羗村宿自笑生涯為底忙

喀喇河屯

樂郊休作塞垣看
山脈膏腴地勢寬
歲歲居民收穫畢
一村紅葉候

回鑾

登廣仁嶺二首

夾道松蘿一馬穿
欲規遠勢上層巔
片雲飛帶遼西雨
疊嶂濃遮薊北天
屬國諸藩青海外
羽林千騎翠華邊
遙瞻佳氣

山莊好榆柳陰中萬井煙

此日車書朔漠同
烏桓置驛往來通
九邊秋色山河曉
七月寒聲草木風
已分生涯隨代馬
那堪鄉思付南鴻
壯夫莫作登臨感
絕塞還憑意氣雄

送蓮士還京用東坡定惠院寓居韻同璞堂作

天涯蹤跡吹飛蓬
塞上相逢坐清夜
虛擬射虎南山邊
却來飲馬長城下
萬里西風度磧來
舉頭皓月當空瀉
關外吹笳木葉飛
樓中橫笛花枝亞
西舍過牆濁酒傾
東家打戶奇書借
匆匆客裏送君歸
片時歡樂花開謝
君歸猶逐春明塵
空向江村憶茹舍
陸生淞泖飽鱸膾

余亦東鄉課芋蔗留滯長裾各自憐少壯幾時更誰怕
何如三復歸來篇北山免使故人罵

題雨林侍衛詩卷和璞堂韻

逢君塞上名姓諳相門昆季森華簪第五之名亞驃騎
明光執戟陪趨趨灤河客舍夫相訪筆跡若椀隨書寵
一編沉思入罔象萬卷鏤鑿隱叢書業業生來戀蠹簡
儒風到底輕犀函示我新詩索題句珠玉頓使山臞慙
雄壇願在下風拜長城敢謂偏師堪文成真有白鳳吐
妙處直向驪龍探天骨高秀山嶽立餘波渟蓄江湖涵

憶昔趨庭正年少

尹文端公督府江南時雨林隨侍

詩名籍甚江之南

建業樓臺映花月秦淮簫鼓浮煙嵐玉醅時時載吟舫

錦囊步步馱遊驂歸來意致復瀟灑舍傍種菊同羅含

日直周廬列侍從夜接文士供清譚當其下筆一快意

亦如褒鄂英姿酣可知文章亦嗜好愛而弗舍寧非耽

榆關秋色滿天地夕陽煙彩澄寒潭貪看清景坐不厭

書生結習何能戡昨夜磧中叫鴻雁西風衰柳垂穆穆

勸君龍堆着鞭去努力蘭錡陪朝參短衣匹馬看射虎

車中新婦情何甘佇見雄文奏羽獵小夫咋舌羞詬誦

八月十五夜灤河旅舍坐月

桂輪飛出彩雲間
徙倚中庭客思閒
夜靜明河依露坐
天空獨鶴響秋山
淒涼異地逢佳節
慚媿清輝照舊顏
笑指廣寒咫尺在
碧霄無路使人攀

十六夜中關行帳坐月疊前韻

徘徊明月萬峯間
刁斗無聲羽衛閒
永夜磧中聞木葉
誰家曲裏怨關山
坐深風露空盈手
話到鄉園亦破顏
最悵伊蘇河畔柳
向人憔悴不堪攀

張三營曉發入崖口

青丘言不才
曉色蒼然接大荒每聽殘柝似行裝
霜花壓帳千屯白露氣浮山百草香
職貢降蕃騎紫駱從圍遊騎逐黃麋
篋中虛擬長楊賦侍從還輸執戟郎

八崖口後丹林翠嶂秋色如繪洵佳境也馬上得
絕句四首

峯巒窈窕水彎環煙采林光縹緲閒
帽影鞭絲晴翠裏詩情多少為秋山

幾簇秋林逐逕斜朝分晴靄暮烘霞
莫嫌絕塞無春色霜葉紅於二月花

十月扁舟泛尚湖
看楓吾谷客提壺
今朝馬上評量處
便較江南也不輸

米家畫本謝家詩
秋色原來絕妙姿
却笑一鞭緣底急
此閒未許坐移時

射熊行

南山老熊作人立
歛雨哮風橫去出入朝攫黃麋暮逐麋
咀嚙毛血充腸饑我

皇聞之赫斯怒期門敕選中黃赴中鎬
真看穿札驚騰空未肯隨弦仆須臾火器環而攻
霹靂列缺飛晴空抗

我顏行殺無赦殲戮直與天誅同洞胸決脰膏鎖弁一
駝之力昇弗舉專車竟等射侯常獻獲非因蹠掌取在
昔周文傳渭畋後車曾載飛熊賢漢家築館盛夸誕詞
賦已陋長楊年我

皇神武古莫比除兇服猛威弧矢君不見蓬婆之師亦

如此時大兵征勦金
川逆首指日奏捷

行帳聽雨戲成

列帳燈昏雁有聲蕭條寒雨入殘更分明滴向孤篷背
底事江南夢不成

虎鎗行

長鎗長鎗柄白木淬出霜鋒利於鏃巨牙猛爪不敢當
老俵夜夜陰山哭天下健者索倫軍熊軀猿臂怒突筋
持以殺虎勇絕倫摧枯拉朽世罕聞上蘭秋獮勤

至尊詔選勁旅隨期門朝來山北大掩羣旌旗疾捲龍
荒雲軼材之獸駭且奔衆中馳入育與賁長林漠漠黃
沙昏馬掣未到氣已吞十盪十決目盡瞋以虎攫虎生
死分須臾毛血何紛紛白額殭立餘怒蹲壁上見者驚
心魂西風吹草白日曛歸來獻獲如策勲命爵行賞承

殊恩我

朝開國神功鑠審遼形勢真天作八旗子弟盡龍驤煙
閣功勲駕褒鄂卽今

天子征不庭去年檄調關東兵蓬婆山頭下霹靂鼠跳
虺裂無搪撐

廟謨講武訓養習驍果一一皆生成鎗兮鎗兮願爾殺
虎更殺賊和門飛閃紅旗色

曉行

衝寒一騎行蹋破秋林葉隔林積雪光照見前山獵

雨林侍衛以曉行詩索和次韻奉簡

匹馬嘶邊草行行逐塞程
四山連霧暗萬帳捲霜明
云雁殘聲落盤雕遠勢平
莫將羌笛怨減却壯夫情

雨雪度樺皮梁

北風穿林吹馬鬣馬頭紛紛打黃葉
山高逕仄雲霧深後峯不斷前峯接
蹴空萬騎聲喧闐山中驚起蛟龍眠
電光墮地馬不前颼忽雷雨生青天
山靈狡獪更遊戲幻作玉虬照天地
雷聲未歇雪片落咫尺不解蒼茫意
緣林被谷路欲窮峯峯積素開芙蓉
苦嫌秋塞太寂寞

靜厓詩初稿

卷七

九

浮花習絮迷煙空書生好奇有癖蹋雪看山度沙磧
回頭却笑灞橋人驢背寒吟鬪詩格

雪後卽目

西風吹寒林山逕人蹤絕對面白濛濛千峯萬峯雪

寄懷同年嵇籬浦

故人愛菊如愛友瘦影亭亭對秋九故人愛友如愛菊
夜夜傾尊照寒綠舊年一榻借寺寮幽情不讓東籬陶
偶然看花就君飲醉來月出西山高涼風天外叫鴻雁
又見霜花落如霰疎英滿地秋斑斑百壺清酒茱萸宴

獨憐絕塞逐車塵
孤負窓前漉酒巾
征衣雨雪不歸去
只恐黃花亦笑人

夜雨有感

絕塞聽秋雨
征夫倍憶家
一燈沉急柝
雙鬢老清茄
天濶雲垂草
風高雁失沙
徹宵愁不寐
無夢到京華

寄伯恭代柬

故人在京國
渺渺劇愁予
問訊騎驢客
殷勤附雁書
風霜侵短鬢
雨雪度單車
何似茱萸會
登臨興有餘

寄元圃

靜庵詩初稿

卷七

十

榆關秋色馬前分
鴻雁聲中萬里雲
每到塞山奇絕處
一回閣筆一思君

去年逐隊到春明
我更龍堆君鳳城
一度黃花又開矣
故園霜露若為情

雨雪和雨林韻

雁向平沙落人從絕壁攀
乍聽澗底雪忽失馬頭山
點點生青髻輝輝映素顏
江鄉何處好最憶剡溪灣

重九日戲作

菊花不上頭螭螯不入手
有脚不登山有口不飲酒
山

中故人書問我歸來否

對月有懷雨林

不解灤河月緣何也泥去人異鄉如舊識獨夜每相親
衾枕天涯夢鬚眉塞北塵南鄰有羈客高詠亦酸辛

灤河旅舍食蟹呈豐山師

佩刀割肉薄於紙涼州葡萄清且美山臞自笑嚼寒齏
冰雪鏗然在牙齒客中風物過重陽白酒黃花墮渺茫
持螯消息那可問夢魂空憶蓴鱸鄉行厨給鮮劇解事
燈前歷落火團至初筵先見置醯薑真味何須下鹽鼓

一筐一甲窮纖毫童僕竊笑憎老饕數月以來得未有
那管巷柝聲聲敲豐山夫子最知我跌宕沈酣無不可
竟使詩人手不空何幸書生腹常果逝將歸去東吳東
五湖煙水橫孤篷漁家簑簪三百箇霜醅初醱缸花醲
忽憶淮黃下流決時聞河患居民大半為魚鱉蛟龍豪橫晝
逐人江鄉稻蟹何堪說對此水族心骨驚西風吹落哀
鴻聲當筵撒箸起三歎南箕北斗參差橫

進古北口作

左折蠨螋塞西風問冷陁暮雲圍磧紫秋草入關青地

勢雄三輔人煙聚七廳行程紀歸篋按轡數郵亭

至日次伯恭韻

雪花點染歲華妍
枵心付短筵
外地萍蓬同逆旅
故園芋栗又殘年
耽尋竹簡三餘在
願乞蕉團萬事圓
最是天涯逢至日
亂愁一夕為君宣

靜厓詩初稿卷七

靜厓詩初稿

卷七

靜臣詩初稿卷八

鎮洋 汪學金 敬箴

古今體八十一首

起乙未盡辛丑
三月官內閣作

題陳其年先生填詞圖

詞客留遺照清豪孰與儔
寶花天女界宮錦謫仙流
明月吹簫侶青山載酒遊
當年紅袖勝蕉夢付悠悠

沉雄湖海集落拓畫圖身
尊宿思前輩清芬見後人
傷心金粉事轉眼雪泥因更乞
桐花像生綃結幻鄰

見表文達

公跋語

雪窓和伯恭韻

西風吹墮羅浮花
紙窓虛白生畫叉
空有鵝溪十丈絹
可惜凍煞金壺鴉
石竹臨階綴寒玉
山檿出窖凝丹砂
子猷一棹可乘興
我所思兮在若耶

疊前韻調伯恭

靜中結想成空花
沈郎腰瘦頻手叉
珠江女兒睡初足
紅蕉窓下塗雙鴉
夢峽忽歸神女雨
汞爐易走仙人砂
髣髴絲歷亂笑何似
維摩禪病棲毘耶

春雪柬伯恭

斗覺春寒峭窓明睡思砭小奚能貰酒雛婢解鉤簾窓
竹垂垂重庭花旋旋添知君應笑我酸瘦擁書籤

園直和鮑雅堂韻

沉沉青瑣隔紅塵錦袖微吟對上春同省篇章長慶集
早朝花柳掖垣人籠鞭清曉鳴珂緩聯榻深宵剪燭頻
君是參軍饒逸興慙無詩句鬪清新

正月十六夜昆明湖上望月呈雅堂

月出滿湖煙湖光漾碧天影搖千頃裏彩徹九霄邊瓊
島春無際滄江意渺然茲遊非不美一倍惜流年

花月春江夜高樓十二闌所思天末遠幾度客中看薄
宦憐雞肋浮生笑鼠肝最憐明鏡影消蝕每無端

是夜月食

無題四首

空谷佳人絕世無姓名樂府記羅敷琴心解語挑新寡
溪水留情戀小姑碧海蒼茫青鳥遠瑤臺淒冷玉蟾孤
料應識得泉清濁翠袖牽蘿態自殊

嫁衣底事為人忙不語停針意暗傷葯蕙生來原自苦
蘼蕪采後已無香畫圖一誤成捐棄繡素誰工試較量
洞口桃花開底事武陵春色付漁郎

一縷芳情夢境賒羣仙環珮列如麻啼鶯似笑沾泥絮
走馬都看隔霧花大婦綺羅驕少婦東家塗抹誤西家
承恩不在傾城貌徧灑鹽枝便駐車

從古嬋娟奈命何舜華顏色易蹉跎淒涼夜雨啼紅粉
層疊春山鎖翠蛾鵲駕休言成渡易鳩媒始信誤人多
三生一掬瓊瑰淚傳與吳江子夜歌

閒曹

閒曹亦自得幽夢隔東華雨墮先秋葉風開近夜花課
童還雜草留客且浮瓜莫笑蟬魚苦生涯在五車

夜宿省中新霽見月有懷璞堂蓮士

禁鑰鐘初動宮壺漏漸多蟬聲清宿雨樹色淡秋河往
事回殘夢流光逐逝波薄帷明月在贈遠意如何

灤河篇送李滄雲兼寄璞堂蓮士

掖垣散直鳴珂珂華堂祖席金叵羅驪駒未發勸客飲
座中邀我談灤河舊年僕作灤河客灤河風景差能說
白沙細草牛欄渡渡河直北檀州路瑤亭村店午時雞
石匣荒營四更霧山行犖确漸入邊南天門高高插天
神梯鬼斧度單軌回顧來遲心茫然出關飲馬長城窟

夕陽黯淡風沙色吹笛稀聞楊柳青
搖鞭最怕楓林黑
廣仁嶺接青石梁萬家煙火灤河陽
蓬萊宮闕冠霞表
嵯峨體勢規

天閭

萬乘巡邊此清暑日月所照開洪荒
今君夙駕朝

山莊鳳池清切承

恩光烏桓風土內史筆餘事收拾詩
人囊男兒桑蓬氣
卓犖莫學吳儂憚并朔已分天涯八
馬蹄休憶村南兩
牛角君不見江東陸生苦博褒南安
小戴人中豪短衣

靜厓詩初稿

卷八

四

匹馬再出塞眼前得失如秋毫笑我今年太澀縮繫而
不食牆東匏

題陸包山畫綠牡丹卽用卷中韻

包山遺墨壓崔藍姚魏叢中別樣看深染楚雲千疊煖
澹分湘管一枝寒猶晴若箇參中午翠羽真疑集上闌
傳出色香超衆品笑他蕉竹謾譏彈

明窓想見拂雲藍生趣真從點筆看道是綠華無定所
却憐碧落不勝寒晴煙常覆琅玕館春色難銷翡翠闌
三闋清平供奉曲風流誰為譜楊彈

半染螺青半蔚藍好從別館貯春看湘簾倩影迷空色
翠幕生香韻曉寒逸態漫教扶綠葉幽姿翻合襯朱闌
分明託體青蓮座金粉全消指一彈

細將臨本辨青藍歐碧依然展卷看別占雲霞成富貴
真從水竹借清寒沉香亭北煙如海金谷樓中月滿闌
一自西園留墨妙須教咳唾莫輕彈

題畫四首

霜林茅屋

西風吹茅簷蒼然四山暮霜影橫晴空人家隱紅樹晚

靜庵詩初稿卷八

五

煙遞明滅秋容互絢素清景入奇懷登高感新賦

疊嶺晴煙

秋煙澹不收掩映青山麓縹緲羃林巒丰容媚崖谷晚風吹作雲片影歸巖宿楓樹晚蕭蕭不見山樵躅

寒山蕭寺

一嶺橫翠微孤寺藏巖坳落日響鐘磬天宇生清寥歸僧度林杪飛鳥投村郊迴顧所來路月出煙蘿交

嵒華秋色

一雨洗秋色煙巒爭晚奇蕭森眇城邑原野風淒其夕

陽秀雲木晃朗明湖湄矯首望徂徠浩然有所思

中秋對月和孫筠亭韻

桂輪騰海曙菱鏡徹霞明人靜河依樹天空斗挂城鵲
飛輝夜羽雁度帶邊聲好夢知何處江南最有情
酒酣燕市上意氣劇憑陵秋入三更笛星搖萬戶燈華
筵紅袖倚遊陌紫騮騰獨有牢愁客寥帷百感增

秋夜招集同省諸公卽席得詩二首

休道高軒陋巷無偶逢清暇一從吾文章天祿仙人閣

諸公皆環珮瀛洲學士圖

座中十八人

荔釀碧封傳五嶺霜

鰲紅擘憶三吳勸君莫惜花前醉已覺流年暗裏徂

滿階紅藥舍人詩猶記聯翩下直時毛羽自憐同社燕

風光還讓出牆枝

時陳厚堂沈魯泉范芝巖吳燕浦俱改官翰林

徐飄林籟催

涼早低纈簾紋得月遲最好六街秋似水接羅應倒習

家池

和張瘦銅賦橘用董香光韻

榕樹江邊一色深洞庭霜後幾登臨追尋往事渾如昨
孤負寒香直到今封蜀已虛千樹計踰淮未改十年心
夢回酒醒還相憶為爾頻番旅思侵

紙帳蘆簾霜氣深短筵密坐燭花臨華亭名蹟曾傳昔
內史新詞又見今蕭瑟久淹三楚夢酸寒同証九秋心
從君乞與清涼味好解文園渴病侵

對月和戴篋圃先生韻

三五冰輪正滿時庾公樓畔有新詩光依露檻秋初到
影散風林夜漸移玉笛聲中低斗柄碧雲天末失參旗
所思今夕知何處清簟疎簾與夢期

直廬對雪和蠡濤韻

萬片隨風繞鳳樓俄看積素晃銅溝飛花入戶縈斑管

落義當簷撲細裘煨芋心情輸老衲問梅消息憶荒邱
灞橋詩思清寒甚脫手難爭白戰道

雪後昆明湖曉望

昨夜酒家酣衝寒曉駐驂梅花一萬片吹不到江南

平定兩金川凱歌十二章

天戈震疊玉門西葱嶺龍沙職貢齊怪底夜郎還自大
旄牛徼外兩醺雞

蠢蠢梟雛竟負恩怒蛙井底笑公孫黎風雅雨蠶叢路
不醒青山杜宇魂

揮諸將出桃關衛霍威名絕域還畫角一聲飛檄到
前軍尅日下烏蠻

期門禁旅衆心堅首尾攻圍陣率然頃刻萬山紅幟滿
誰言蜀道上青天

紛紛鼠子與狐羣謔出俄驚烈火焚五日長驅收滴博
真從天上下將軍

礮車動地殷如雷夜半三軍捲甲來百隊橐韃飛鞚入
弓弮剛對月輪開

三匝衝臨勢莫支累累俘繫送京師青羗帳下齋膜拜

靜庵詩初稿卷八

八

喜見官軍入蔡時

武成喜氣滿周廬
鋌鹿封狼盡掃除
自是

廟謨能將將五年丙夜

問軍書

蓬婆嶺外落欃槍
玉壘風和捲旆旌
馬上征人饒吹曲
海棠春雨過縣城

郊臺鼙鼓節金罇
三輔歡聲九寓春
二十年閒逢盛事
畿南父老話庚辰

入覲鷹揚

寵命崇和門凱宴錫彤弓請看當代麒麟閣爭羨平羗
第一功

玉燭珠鈴六幕和洗兵策檄挽銀河九功七德鈞天奏
新譜已江破陣歌

棟鄂孺人節烈詩

孺人將軍永常女適舒相國季子夫亡殉節為
作是詩

幽蘭生邃谷葩葉揚芬芳弱女生貴門志行懷貞剛借
問女為誰族系出金張阿爺為節度出入建牙璋弟兄

及羣從執戟侍明光阿女少小時窈窕世無雙十三受
姆教容止持矜莊十五在深閨履綦絕中唐二十結褵
悅及時六禮詳借問夫婿誰相公第六郎瑤環與瑜珥
娟好神清揚門前白馬來輿服何煌煌升階奠羔雁羅
列東西廂百兩爛盈門阿女心悲傷下堂拜父母入門
事姑嫜登車緩緩去鸞玉聲和鐙車前何所有鼓吹導
璈琅車後何所有纁帛充巾廂頭上大秦珠耳後明月
璫纖纖約蕙帶冉冉飄蘭裳錦衾襲文簟繡帳垂香囊
相公喜婦來雞鳴肅珩璜夫人喜婦來蘋蘩佐烝嘗諸

婦喜婦來閨闥生和慶門闌自相對伉儷自相當戚鄰
無閒言琴瑟歡由房相公奉

王命乘障度河湟節度鎮絕域幕府開新疆阿婦隨姑
行帷車出燉煌弱質輕遠道慷慨無悽惶

君親念大義敢迴兒女腸免絲與女蘿萬里同飛揚涼
秋八九月白草吹邊霜寸心抱戚戚夫婿形羸羸但願
蘭桂質金石同康彊前年召相公迴節朝

天閭秉鈞贊密勿垂紳步巖廊金釵卜歸期對鏡理明
粧旦入嘉峪關暮渡桑乾梁啟我東閣門坐我西閣牀

所冀病漸瘥藥餌親扶將偕老侍晨昏比翼相頤頤今
年屆炎令大暑如沃湯時疾猝中之遘疾在膏肓扁鵲
乏良術巫咸不我禳相公坐中書晨夕理閣章公義罔
顧私居處莫或遑恐亂大人意欲語心傍徨上堂奉色
笑下堂淚盈睚夜分不交睫那復沾勺漿天乎降鞠凶
夫也罹其殃六月日壬午忽焉歸冥鄉隱隱何田田哭
聲如壞牆死者長已矣淚盡繼以血矢志願身殉家人
苦周防聊復緩須臾妾命寧久長相公痛西河慰唁哀
侯王前筵設桂醕後筵剖猪羊虞殯既有日薤歌激清

商丹旆發前路素翼掩星芒寶馬十二匹珠絡紫游韁
熠熠大羽箭貢竒來舂舂雕服屈盧弓覆以錦襦襠皆
君舊時物故遣依君旁十年託微軀豈異生死方長號
動天地愁雲為低昂迢迢東直門寂寂北山邱北邱何
所有秋風吹白楊其下走魑魅其上啼鶩鴝感此折心
骨淚落千萬行君無小兒女焉用依嫠嫠君有兄與嫂
可以承頤康君旣先妾行妾寧待終喪理我青銅鏡佩
我衡蕪香頭上大秦珠耳後明月璫纖纖約蕙帶冉冉
飄蘭裳是妾嫁時物奉君燠與涼同室復同穴泉路寧

蒼黃列星曙耿耿雲漢傾西荒天空下白露四野聞寒
蜚徘徊入丙舍訣絕人云亡回頭語中婦此別真茫茫
憶妾初來時榛栗同承筐今日丁大故賴子慰高堂綰
我絕命縷結作同心纈斂衽乍哽咽奄忽頽秋陽玉貌
如生時顥氣橫旻蒼相公聞婦死太息稱其良夫人聞
婦死塌焉中摧戕諸婦聞婦死行坐各悵悵合葬啟窆
窆貞骨黃壚藏墓前連理枝一一棲鴛鴦有司上其事
天子詔建坊公卿製哀誄彤管芳名彰春秋書伯姬風
詩美共姜黃鵠樂府辭斑竹留南湘茲事古所難處之

立尋常勁草挺疾風砥石迴瀾狂大節厲末俗貞行扶
三綱作詩告庶姬念之慎勿忘

賦雪六事

梁園授簡

臨邛車騎客名邦雪後園林拓畫窓綠綺高寒淒玉軫
驪裘沉醉倒銀缸千秋盛會原無幾一代奇才豈有雙
莫訝惠連推許重鄒生枚叟本心降

王恭鶴氅

高輿夾路擁雲旌毳氅翩翩捲素苞玉宇空明修翮舉

銀花飛舞片翎梢斯人大有煙霞氣與爾堪為冰雪交
便是神仙小遊戲凌風歸去訪三茅

山陰訪戴

白雲一夜凍松杉有客扁舟興不凡斷岸冰澌衝暗櫓
遠林鴉陣避高帆名山勝引紅藤杖幽澗寒欺白罽衫
記取故人茆屋近柴門深閉萬重巖

謝庭咏絮

灑落東山太傅懷中閨有女思清佳隔牆亂颭烏衣巷
拂戶輕投玉樹階欲折花時低惹袖乍鉤簾罷故縈釵

須知林下風神別超悟寧隨羯末儕

灞橋尋詩

席帽疲驢度灞陵舉頭太華玉峻嶒吟衝凍澗寒生骨
思琢冰花句有稜黃葉水村難覓路遠鐘山寺不逢僧
歸來破屋掀髯笑好盡今宵酒數升

學士烹茶

閒庭積素映重簾一握輕明試玉纖香絮漸消春水活
落梅細點乳花添幾回領略詩懷澹半晌清寒睡思砭
試問繁華金帳底何如紅袖擁書籤

題竹裏彈琴圖

草驢席帽三年客，孤負西窓好顏色。但乞滄江一片秋，
便洗宣南塵數尺。羨君置身此畫圖，雖不識君亦相憶。
期我扶筇月夜來，七條絃上瀟湘碧。

送許春巖典試蜀中

鳳池新命一時聞，三蜀掄才更羨君。報

國文章通策棘，及門弟子得淵雲。傳衣莫惜金針度，濯
錦須裁玉尺勤。他日同官相憶處，紫薇花下坐斜曛。

宋杏川觀察得太湖石繪圖賦詩索和次韻奉題

秋蕪雨澀煙荒荒土花一尺埋青蒼誰家臺館化烏有
歸然石丈存靈光湖上芙蓉初削出莫釐峯頂銜朝日
何年遷徙落天涯僵卧支離氣常屈使君新拓好園林
此閒合有雲巒深眼中突兀急輦致奇物顯晦知天心
通路亭邊矗空起碧螺倒影照秋水菴地濃陰鎖翠寒
九疑風露啼湘鬼使君好事今米公墨華著紙輕煙籠
披圖使我三歎息歸心已在東吳峯

後無題四首疊前韻

畫眉須問入時無豔色還憑粉黛敷竊藥成仙羞素姊

貫錢娶婦笑黃姑扇中蟬雀歡時合機上鴛鴦斷後孤
堪笑人情輸鏡面新粧都道貴來殊

芻尼送喜為誰忙著雨嫣紅片片傷緣淺未栽連理樹
豔消難覓返生香如雲舊夢何從省似海深愁未易量
堪笑世情多謬誤孤山也道屬彭郎

瓊島珠宮路本賒前生無分種胡麻百年轉眼如流水
一倍傷心是落花江漲已銷桃葉渡春風不到葦蘿家
等閒碧玉東鄰女陌上今朝七寶車

錦瑟年華怨若何及時風月暗蹉跎山雞窺鏡爭鸞采

野蝶銜花號鳳蛾石上香殘翻覆易樓中珠返棄捐多
舞衣零落堆箱篋枉煞霓裳第一歌

題汝南表兄涉江采芙蓉圖小照

涉江采芙蓉芙蓉覆江渚日暮吹參差秋風雜秋雨楊
林渡頭萬朵花夕陽片片飛紅霞拍波雙槳不知遠一
水門前直到家君家舊住蓮塘口少小牽衣君記否碧
簫勸酒急鼓搥笑賭花枝在儂手天涯飄瞥兩浮萍花
落花開幾度經尊前莫唱耶溪曲煙月淒涼不可聽夜
來忽夢江南路與君攜手花深處江上芙蓉爛漫開何

青房言才秀
不乘潮渡江去

石士蓮士兄弟同遊陶然亭歸集敝齋小飲座中
蠡濤走筆成詩次韻和之

三年入中書塗抹費官紙
母猴刻棘端醯雞舞甕裏之
武壯不如臣朔飢欲死鬱鬱樊籠身嘈嘈箏笛耳退直
憩齋閣閉門脫冠履息交謝羣居破寂得二士投合放
眼青灑落軒眉紫為言陂原佳聊趁風日美秋光淡菰
蘆野心狎鹿豕北闕望連雲西山燦列几晴峯點似螺
煙墟聚如螳側睨窮秋毫大觀納芥子有客酒滿尊高

歌調變徵竟澆傀儡胸忽紆幽結痞不覺忘形骸遑復
論揖跪一石醉亦可千場興未止蕭條買駿臺慷慨屠
狗市所恥樓護鯖有慕穆生醴江饌巨口魚村事長腰
米山中收橘奴牆脚粲菊婢鄉園胡不歸風塵亦可已
倘假潞河帆一笑折屐齒

春日城南看花之作

長安二月時花發南城陌溪桃屋角紅山杏牆頭白東
風吹我衣駕言理輕策花開一度看花落千回惜試問
花前人生年誰滿百不如對花酌興來盡一石月出東

南隅花影弄流魄花月憶江南春愁黯今夕

雨後小集陶然亭得詩二首卽以陶然為韻

亭外落霞高歸禽粲羽毛晚晴開遠郭夕爽散平皋良
會期珍重清尊破鬱陶明朝燕市上傳說酒人豪
不見西山色重來忽半年乍過蕭寺雨漸散晚峯煙魂
夢江湖遠風塵歲月牽茲遊莫孤負留待月蒼然

盆中牡丹

鞋紅聲價本無倫出窖穠姿照眼新繡幕未迴燕谷冷
金錢爭買洛陽春風光大抵都因熱富貴何須早致身

輸與山窓老梅樹天然冰雪倍精神

夏日遊清泛園

佳遊須趁馬蹄閒小約經過曲磴攀清夢乍離塵土外
好風多在竹梧間泉淙激石鳴琴瀨雨勢排空潑墨山
忽憶江鄉銷夏處夕陽晞髮棹歌還

扈從熱河別寓中諸子仍用前韻

自笑生涯未許閒勞勞休悵柳條攀乍攜彩筆螭頭上
便拂征衣豹尾間絕塞吹螺窺曉月長城倚馬看秋山
書生豪氣應如舊款段重教一往還

熱河新建

文廟試院敬和家大人紀

恩詩韻

萬家煙火溯

豐詒并牧蒙熙效媚茲三輔車書開郡縣百年禮樂作
君師聿循

祖興徠藩翰屢切民依勛尹司何幸此邦諸吉士高岡
翺鳳應

昌期

薰颺拂路曙光新馳道遙看碾麴塵

萬乘豫遊籌富教八埏歡慶洽人神棘闥特啟師儒席
芹泮初垂弟子紳私喜鳳池清切地屬車先許捧

溫綸

丹楹黃屋冠蒼巖吉日鳴

鑾俎豆嚴風細弦歌飄一邑雲晴觚爵舞重簷章縫習
禮園橋列奎壁騰文太史占從此塞垣覃教遠
御碑穹峙萬方瞻

冰鑑空明重士林日邊持節此遡臨使輶近迓

靜庵詩初稿

卷八

六

虞巡駕講幔遙傳孔壁音

試署在文廟西偏

聞禮暇依官閣靜

含香曉直

禁廬森願隨蹈詠邦人後世業酬

恩矢寸心

題周倅出塞圖

羌笛西風唱塞童朔雲邊雪出關同
行程記與鴻爭北
宦興消來馬欲東
萬事無如詩卷在一官
原比畫圖空
燈前紅袖應相問
白晢鬢底許雄

歲暮散直卽事言懷呈同直諸公

省垣散直歲華闌如水時光瞥眼看薄宦中年成感遇
閒身一月比休官雪窓醉墨驚毛素煖窖烘花鶴頂丹
竹戶紙簾無箇事欲從丈室覓蕉團

頻年子舍傍京華笑語渾忘客裏家海燕尋巢迷雪壘
江魚調膳憶冰花望雲心事庭闈遠踰月音書道至賒
彩勝屠蘇陳節物春風無那隔天涯

舊屋牽蘿計已虛孟郊家具賦移居鷓鴣託羽枝寧擇
蟋蟀驚心歲又除冬蓄時需謀婦酒宵燈重對課兒書
朝來掃徑將迎便冷淡蔬盤一過余

追尋往事夢疑真，鴻爪留痕記舊因。劉井柯亭誰得地，

吳衣園編修

滇雲楚樹幾懷人。

許春巖觀察王梅岑太守

爭看使者青油

幕

孫寶嚴方伯

可憶先生烏角巾

陳雲岡侍御歸老閩中

聚散升沉都

一笑花前莫負凍醅春。

壽肅州刺史康鏡溪

隼旗虎劍領雄州，使者才名第一流。慈嶺雪羝歸萬里，

榆關雲稼入三秋。吟成紅藥新聲繼，去後甘棠舊澤留。

酌兒公堂知有喜，

恩光先接晉康侯。

和豐山師同竹井錫山兩相國讌集詩韻

蓬萊近處隔埃氛
文讌餘歡到夜分
勝賞偶乘佳日暇
新詩還博素交欣
爭傳仙醴芳傾露
乍試宮牋膩研雲
珍重花前申後約
海棠簾幕鬪紅醺

用前韻呈竹井相國

冰壺何處著纖氛
流品都從一鑑分
清望誰如公落落
春風常許物欣欣
書城坐擁三弓地
吟榻閑消一炷雲
獨喜聞詩從鯉對

仲君與
余同年

可容東閣侍微醺

呈錫山相國

門對西山散夕氛鷗波新向液池分

海淀賜園

韋平世澤承

恩渥王謝風懷卽事欣暇日詩篇傳白雪微才嘯植託
青雲平泉莊上花時候已有春醅待客釀

呈豐山師

觚稜天半捲晴氛春到人閒便十分遲日漸籠溫樹藹
好風微逗早梅欣窓中雪磴玲瓏石牆外春泉活潑雲
退直

金鑾餘興在蘭亭得意偶成醺

闡中口號

六年左掖頭銜換

時已遷秩
郎尚未引

起居

見

五度南宮腳跡收

莫道班生無骨相但能投筆便封侯

靜厓詩初稿卷八

靜厓詩初稿

卷八

主

靜厓詩初稿卷九

鎮洋 汪學金 敬箴

古今體五十二首

辛丑得第
官翰林作

會試聞報後感而有作

夢中難乞筆花靈榜帖傳來訝誤聽歲月驚心三獻玉
科名彈指一周星
余自庚寅秋選
至是十二年矣升沈益信遭逢偶甘
苦都從閱歷經博得高堂添色笑泥金計日到門庭

四月二十一日

太和殿對策恭紀

闔闔瞳矐曙色開

玉皇香案列卿陪殿頭黃紙傳宣出

天上紅綾飽啖來空愧班行依

禁闥難將拜獻効涓埃錯疑夜直趨蘭省銀燭光中燐

筆回

二十四日

進呈十卷蒙

御定一甲第三

乾清宮引

見恭紀

上卿趨侍閣門班內殿傳呼

大駕還

是日

圓明園

聖駕從

宮拔十

臨軒親簡擢魁三得地許躋攀芻蕘豈意邀

宸鑒葵藿先教仰

聖顏枉說紫薇花下客今朝始得到鰲山

二十五日

太和殿臚唱恭紀

爐煙馥郁動華鯨奎壁騰輝近太清殿闕雲中瞻五色

姓名

天上聽三聲仙韶徐奏瑤閣啟

御榜初開綵仗行何幸

微臣

叨異數一家再世荷生成

赴歸第宴口號

一行鼓吹萬人譁京尹門前唱早衙座上宮袍香裊露
筵前仙醴豔流霞名叨及第三元榜人說傳家兩世花
羞向春風誇最少已非入洛舊年華

次日赴禮部宴疊前韻

禮樂觀光肅衆譁容臺軒蓋早趨衙中朝卿相名齊斗

同輩文章氣吐霞三爵許聯宗伯席雙枝獨占曲江花
是日惟余得花兩枝詢之堂吏云故事如此欣看咫尺登瀛地
轉東卽翰林衙門更躡蓬萊賦日華

二十七日

午門前

頒賜表裏恭紀

青袍待

詔公車選黃紙簽名

御勅宣拜

靜厓詩初稿

卷九

賜爭趨雙闕下承

恩先在六年前

丙申恭繕天祿琳瑯恩賜文綺攜來蜀錦花增麗製

就萊衣彩更鮮莫便衆中誇染汁敝裘對此恐淒然

詣

太學行釋褐禮恭紀

盛際遭逢

教育恩十年重到舊橋門遍題姓氏科名貴齊拜師儒
道學尊幾度摩抄看石鼓半生疎陋誤金根文章政事
今伊始青紫紛紛莫漫論

二十九日

保和殿朝考恭紀

今朝身到

紫宸居片紙傳題捧

御書爐篆細隨雙袖起筆花爭向五雲舒封函特達文

章貴

一甲三卷另封進呈

漏點悠揚晷刻徐一輩

尚方同給札冰銜優異荷先除

偕錢湘舫陳湘南兩同年赴翰林院任卽事述懷

長街緩控紫游韁下馬聯翩上玉堂道是近天題彩筆

靜厓詩初稿

卷九

却教同日詠霓裳
新巢補處形鳩拙
故紙鑽來學蠹忙
珍重初心諧臭味
莫言報

國但文章

謁韓文公祠

在院署

司命從來信有之
昌黎俎豆此閒宜
文章自是千秋業
風義真堪百世師
月露成家慚偽體
星雲翊運答
昌期卽今堂下諸
生拜猶似先生進
學時

赴教習館呈豐山師

蓬山特啟師儒席
芸館初分弟子行
盡道韓公真北斗

曾依永叔舊東堂聽來殿履星辰動攜出宮壺雨露香
借問臯比誰得似金針親自繡鴛鴦

房師山陰王西霞先生招集及門諸子卽席有作
次韻奉呈

丈譙東堂接綺筵漫將姓氏廁羣賢爭投海水珍珠網
也逐天街軟玉鞭蘭渚壺觴今信美濂溪風月本無偏
座中與點狂如舊醉卸紅衫弗上船

觀光曾記歲逢庚屈指周星遇合亨媿說弓裘叨鯉對
許傳衣鉢到鯁生

先生庚辰登賢書閏辛卯及第余庚寅舉京兆試至辛丑成進士前後適

符名依珠榜三元瑞官署冰銜四座清須識龍門倍聲
價相期珍重素心盟

次韻和吳蠡濤省中夜直卽效其體

明月在天如可捫
捐簾蝙蝠紙窓昏
殘香裊裊夜吟澀
孤燭作花秋夢繁
蟲絲黏露有微影
蟬蔭得涼無一喧
獨羨紫薇舊同直
年年秘殿奉綸言

次韻和蠡濤聞歌却憶蘭州軍營事

一曲黃河馬上醺
弓刀小隊兩參軍

時與首末
兵曹同行

五更折

柳墮關月萬帳吹螺低陣雲天涯蹤跡笑秋梗眼底風
光愁暮曛今夕華堂沸絲管中年更得幾回聞

為有源頭活水來為豐山師賦

豐山師海澱別業有小池久涸疏之得泉翌日

成渠命及門諸子賦是題

潏然何處見靈源便覺淪漣碧沼翻乍引銀潢通曲竇
恰看玉溜瀉前軒半匳鑑采窺菱照一線雲紋上蘚痕
淺撥土膏沙脈潤濃分石髓乳流溫花間穀縹因風蹙
竹外琴絃雜雨喧空影迴波交荇藻暗香穿徑汎蘭蓀

成章漸悟方圓理得意還逢左右原
挹注如斯知坎止
委輸從此想坤元誰人試取中
冷味茲地曾涵太液恩
最喜文瀾添活潑莫教心井
誚枯智微涓總荷蒙泉養
衆派都歸砥柱尊須識朝宗
資有本好將疏鑿溯崑崙

題座主大宗伯定圃先生荷淨納涼圖

昆明湖上紅霞起荷花一開三十里
青山倒影浸玻璃
落翠空濛鯉魚尾太乙仙人一
辦花手持玉書雙髻了
天孫璇室晨舒錦海客珠宮夜浣
紗尚書早直明光殿
水嬉催侍華林宴小築城南韋杜
居特開天上蓬萊院

卽今曉禁緩鳴珂仙苑滌洄少海波不知何處衣香惹
定有薰風拂檻過午橋退直歸來晚曲榭迴廊坐清遠
卸却朝衫著接羅雨後秋光在西崦水天夕陽飛鷺鷥
碧雲縹緲吹參差湘簾半挂月初上正是紅衣欲墮時
六月虛堂不受暑香篆茶煙銷幾許若問東山後樂心
人閒遍灑清涼雨從來好事畫圖傳聽履星辰近九天
他時更補沙隄路曲裏還歌相府蓮

納涼詞和蠡濤韻

瀛洲亭上踏紅蓮似泛蓬萊海水船消得玉壺冰一尺

詩情恰在晚晴邊

酒香新試海南瓢
漫憶簫聲廿四橋
歌扇舞裙太旖旎
綠天醉墨寫芭蕉

積潦周堂雨似麻
屋簷乾鵲喜查查
潞河水長南船到
載得江鄉幾種花

小印規撫秦漢後
斷縑欸識宋元初
槐花深院人多病
獨借東鄰本草書

定州菱枕白瑪瑙
蘄州竹簟黃琉璃
放頭伸脚普騰睡
又是林梢月上時

牆脚吟蛩漸漸聞秋光先借雨三分豆花籬落明河影
滿地露華流碧雲

銷夏灣西送夕陽人家一半在湖光秋來好寄雞頭棗
供得京華十日糧

年華暗覺髣毛珍半榻松風綠雪酣領取清閒好滋味
春浮小炷學和南

和定圃先生青石梁詩

拔地飛梁與鳥齊雨蘿煙萼一攀躋衣痕飄瞥層層瀑
馬足凌兢步步梯翠削不成窮擬似青收未了想端倪

靜厓詩初稿

卷九

八

九天欬唾隨風落始信星河下界低

題座主中丞吳香亭先生春郊歸省圖

曾奉

龍旂出還持玉節歸孝思光累闕公望屬崇闈
經術容臺表德輝秩宗三禮寄

時邁百神威禋祀臣衷恪懷柔

帝化魏列卿常伯重奕葉

國恩稀歲事辭

行殿陳情返舊扉豫徐千里近霜露十年違芳草催珠

勒穠花點毳衣邦人榮畫錦使者感春暉歲月音塵隔
雲山涕淚揮心傷鳥鳥哺目斷鵲鴿飛賜宅藏書卷封
阡種柳圍吾宗存質樸先緒念虧欵計日還清職瞻星
指近畿

新恩除斧繡餘戀在驂駢喬木風煙古皇華雨雪霏畫
圖留往蹟家乘炳前徽金紫斯為盛丹青此庶幾師門
傳世澤展帙寸私依

次韻送陳青柯出守撫州

十年郎署聲名大擁節新看手勅除歸夢底應離雲水

宦情未免為匡廬纏綿螺甲三升酒料理牛腰幾擔書
多少鄒枚共惆悵使君驄馬且徐徐

爭羨輶車滿路光西園翰墨好端詳攜將天府琳瑯筆
雅稱山家骨董囊幽谷迴谿蘭葉暖斷煙疎雨竹枝涼
物華從此呈天寶莫道名材擅豫章

郡齋清瀟對江濱按部南州露冕新付與溪山了無事
到來魚鳥自相親廬陵太守稱翁早彭澤先生結社頻
猶是長安舊風味典衣都買玉壺春

雪泥蹤跡記勾留一曲驪歌潞水郵手版已辭梁苑客

頭銜合署醉鄉侯江樓倚月三更夜查客乘風萬里流
三十六鱗何處寄碧雲無際楚天悠

送同年嵇籀浦之官建昌郡丞

嵇生天下士個儻慕奇節弱冠破萬卷下筆洪流決每
懷經世才讀書更讀律長揖公卿閒顧盼氣突兀英英
玉立姿煜煜昆刀切努力期榮名相門踵遺烈却笑王
謝家開口侈閥閱疇昔歲在寅京兆魏科掇登龍幸追
陪附驥忝叨竊衆中傾蓋歡欬唾霏蘭雪千里萍與蓬
天涯兩飄瞥春風渡江來瓜步煙波漵卸帆訪故人旣

見憂心輟贈我瓊瑤詞篋中字不減眷懷平生親寤寐
如饑渴握手春明門遙羽建章闕秘閣襲華裾期門控
金埒樹立務遠大指揮厭瑣屑浩蕩濟川才長風揚溟
渤譬如處囊錐天然脫穎出品藏籟青雲聲名動朝列
走也局促流學步難戛戛君才誠十倍交善不為劣暇
日每過從肝膽虹霓揭沈酣酒數升跌宕歌三闋當其
慷慨時耿耿懷中血東閣正雍容西州忽嗚咽謂舒文
襄公
春草及時芳啁啾響鴉鵲衆女嫉蛾眉謠詠一何譎誰
知鶴在霄肯效鼠鬪穴紛紛濫竽吹鬱鬱唾壺缺劍氣

在風塵光芒不可沒豈少國士知指為千夫傑礪底冰
雪花性不附炎熱相期歲寒交恥作春葩悅遂訂膠漆
堅勿使形影失今年僕改官新巢愧鳩拙本不習吏事
聊復弄紙筆君以宏達才職司在密勿五馬忽新除六
年滿省秩那堪驥足展無乃牛刀割都人爭惜君千聲
同一說君言一介士立心思濟物承哉不負予小試未
為屈行矣勉前途僕夫戒脂秣省垣舊同官執手嗟契
闊相送潞水頭衰柳臨風折歌驪曲未終寒林澹斜日
願君進一危請聽吾言畢建武僕舊遊風土差能述氣

節士行敦儉樸民情率從來賢有司吏治飾經術聽訟
草生庭放衙琴在室靈谷謝公詩仙壇魯公碣偶得簿
領閒且對溪山逸他年甘棠陰邦人戒勿伐送子自此
去黯然不成別惆悵各沾巾寸心已飛越但恐後會期
星霜變毛髮回首東華塵相思渺天末閣下紫薇花點
點秋蕭瑟

秋日房師西霞先生率及門諸子謁總憲觀補亭

先生墓感賦二首

總憲余庚寅
鄉試座主也

太息橋公墓何人熟辨香先生重風義公子感秋霜落

日生芻薦寒原宿草荒生平知己意記哭總帷旁

回首東堂客於今十二年墓門新涕淚喬木舊風煙寂
寞黃墟恨蕭條流水絃無端今昔感淒絕暮雲天

賦得欲書花葉寄朝雲

茗溪戴玉豐所製小穎管頭鐫義山句松雲館
師喜其清和圓潤便於臨池為賦是題試筆遂

同賦焉

繡幕濃芬化曉雲一花一葉鬬芳新書將五色江郎管
寄與三年宋玉鄰欲往從之湘水碧更無言處楚宮春

石闌點筆看初起翠袖拈毫認未真畫棟飛來香似海
歌臺散去夢如塵詩題山柿紅相亞墨試窓蕉綠乍勻
鬢鬢參差傳意態衣裳飄忽想丰神瑤情珍重何難達
綺語纏綿且莫嗔佛地鬢光隨頃刻仙家裙綰偶逡巡
誰銷金粉傾城劫頓悟繁華過眼因底事折枝逢驛使
若為紉佩贈騷人巫峯頂上朝朝見觸撥閒愁錦字頻
前題次松雲館師韻

瑤華何處寄芳春一片行雲夢未真暮暮朝朝巫峽遠
花花葉葉洛陽新最憐解語初凝睇欲寫相思漫效顰

蓬島煙深傳鳳翼湘皋波闊送魚鱗瓊樓金屋文章豔
霧鬢風鬟想像神書就定分江管麗裁來還比薛箋珍
濃香暖化濛濛曙薄縷晴添渺渺晨十二碧峯縈淺黛
三千玉界落纖塵謫仙絕調憑誰托騷客微詞借爾陳
訝是題紅通苑水錯教拾翠傍川濱明河縹緲原無路
斜月娉婷若有人假使青冥吹得到廣寒仙種結成鄰
題引藤書屋圖

香亭先生海王村舊寓有古藤漁洋尚書手植
也後移寓橫街分支為引藤書屋繪圖屬題為

賦是詩

老屋走龍蛇藤蘿絡架斜誰攜今夜月來照舊時花往
事思尊宿繁陰閱歲華東風吹酒綠春色渺天涯

宋玉臨江宅應為庾信園百年看代謝一樹寄思存徒
植憐生意分陰戀故恩春來花發處漸已過前軒

夫子今宗匠漁洋有嗣音辦香曾氏席帶草鄭家林畫
卷都人重風騷一力任卽看接引意門下滿新陰

王石亭至都

昔時捧檄衝冰去今日騎驢踏雪來萬里波濤三月宦

九秋風樹百年哀尺書袖裏情難滅雙髻燈前老暗催
嗟爾飄零幸無恙相逢且盡故人杯

寒齋十二詠和曹儷笙同年韻

紙窓

剡藤補就玉玲瓏虛白生來質本空草閣眼明晴雪後
竹簷夢隔冷雲中香痕碧染氤氲霧燭影紅搖料峭風
愛趁朝曦便細字安排曲几傍前櫳

布簾

底用青絲步幃圍深深簾幕却霜威留香婢解雙犀押

話若僮窺一塵揮夜月有情梅暗度春風無恙燕還飛
最宜踈地垂垂處半晌吟懷剝啄稀

煖炕

陽和不信到來偏丈室春生火始然急雪打門堅夜坐
溫曦穿戶足朝眠休嫌老屋衾如鐵忽訝鄰家突有煙
頭腦冬烘偷問訊怪渠不似舊寒氈

煤爐

鐵堪土銚用相兼中熱無端炙手炎自分窓前親櫓拙
焉知世上燮梅鹽留將宿火封泥固撥盡殘灰借箸添

錢歲家家爭祀竈圍爐滋味底須厭

煖硯

自笑鯁生硯未焚玉堂小炷試羅紋一波暖散溶溶液
四角春生冉冉雲活眼乍開鸛鵒潤名香還漬鷓鴣熏
從知元化資調燮新奏中書第一勲

案氊

三尺烏皮襯罽毼不教隱几起廉隅豐茸軟稱芸囊展
屣貼平宜繭紙鋪與我周旋交冷淡耐人塗抹迹模糊
多年儒席休相負風雪寒窓坐卧俱

花瓶

凡硯精嚴絕點塵
軍持雅供折枝新
添爐活火冰消夜
捲幕生香水注春
空色雲藍留淨相
幽情紙帳見橫陳
劇憐鼻觀清溫味
相對無言覓句晨

羊裘

漫言狐貉擁深溫
檢點寒衣敝褌存
五月尚留雲水跡
十年難辨雪泥痕
換來墟畔謀春酒
補向窓前趁曉暾
底事紛紛誇紫綺
輸他稱體伴朝昏

暖鞋

輕勻壓線軟裝綿病脚溫
和散步便深巷雪痕殘醉後
小橋霜跡冷香邊仙粧枉說
千紋布家製多添一片氈
最是官韉催著處暫時拋撇
早朝天

煖鍋

小於鼎鑊矮於鐺一器渾如
四簋盛前箸客貧兼味飽
初筵親試割鮮烹杯殘儘許
添餘燼壺冷還宜止沸羹
要識不因人熱意朱門枉煞
五侯鯖

手爐

漸覺衣香隔幕來熏爐星火
暗中催牀頭宿炷經宵在

青房言不示
卷九
腕底陽春驀地回一瞥因緣看點雪幾番心事笑燃灰
朝來雙袖深籠處欲寫雲牋冷未裁

雪水

一庭積素瓦溝盈便覺餘甘齒頰生茗椀香來融碧乳
竹爐煙起化瓊霙江南苦憶中泠味榻畔喧傳急雨聲
若使端明添小錄清寒雅稱玉堂烹

靜厓詩初稿卷九